


25.03.2021

Հաստատում եմ՝  
ԵՊՀ պրոռեկտոր  
Է. ԱՍՐԻՅԱՆ



Կ Ա Ր Օ Ի Ք

Սուրեն Սերյոժայի Աբրահամյանի «Արդի հայ պոեզիայի գեղարվեստական համակարգը» թեմայով ժ. 01. 02 («Նորագույն շրջանի հայ գրականություն») մասնագիտությամբ բանասիրական գիտությունների դոկտորի գիտական աստիճանի հայցման ատենախոսության մասին: (Ընդունված է ԵՊՀ հայ նորագույն գրականության ամբիոնի 2021 թ. մարտի 29-ին տեղի ունեցած նիստում, արձանագրություն թիվ 6)

Ելույթ ունեցան պրոֆ. պրոֆ. Վ. Գաբրիելյանը, Ա. Ավագյանը, դոց. դոց. Ս. Գրիգորյանը, Լ. Սեյրանյանը:

Նշվեց, որ Սուրեն Սերյոժայի Աբրահամյանի «Արդի հայ պոեզիայի գեղարվեստական համակարգը» թեմայով աշխատանքը կատարվել է ՀՀ ԳԱԱ Մ. Աբեղյանի անվան գրականության ինստիտուտում, որտեղ գործող ԲՈԿ-ի Գրականագիտության 003 մասնագիտական խորհրդում էլ կայանալու է պաշտպանությունը: Խորհուրդը այն կարծիքի է ուղարկել ԵՊՀ հայ նորագույն գրականության ամբիոն՝ որպես առաջատար կազմակերպության:

Նշվեց, որ պաշտպանության ներկայացված աշխատանքը ընդգրկում է հսկայածավալ նյութ՝ մեծաթիվ ու տարաբնույթ բանաստեղծների ստեղծագործությունները, որ հեղինակի պարբերացումով՝ «արդի հայ պոեզիայի» ժամանակահատվածի շրջանակում են: Հեղինակը քննում է նաև արդի հայ պոեզիայի ձևավորման, ակունքների շրջանի իրողությունները՝ ն՝ պոեզիան, ն՝ տեսությունը:

Այս մեծածավալ ու ծանրակշիռ ուսումնասիրությունը նախ լույս է տեսել մանրատառ 740 էջանոց գրքով, ապա համակարգչային 600 էջանոց խմբագրված տարբերակով ներկայացվել պաշտպանության՝ որպես դոկտորի գիտական աստիճանի հայցման ատենախոսություն: Աշխատությունը իրապես գնահատելի է մի շարք կողմերով, որոնք մեզ՝ որպես արտաքին գրախոսի, լիարժեք հիմք են տալիս այն

երաշխավորելու պաշտպանության, նաև հավելելու, թե դրա հեղինակն արժանի է իր հայցած գիտական աստիճանին:

Ուսումնասիրությունը թեմայի, նյութի այս ընդգրկունությամբ արդեն իսկ վկայում է, որ այն տևական ու տքնաջան աշխատանքի արդյունք է, որ հեղինակն իր «նյութի» մեջ է ու նրա հետ: Ս. Աբրահամյանը պատահական դիտող չէ, տարիների իր գործն է եղել դա, արդի (և ոչ միայն) հայ պոեզիայի, նաև գրաքննադատության զարգացման ընթացքին նա հետևել է մշտապես:

«Ներածությունից», «Քննադատությունը և գրական ընթացքը. պատմական ակնարկ», «Ռ. Դավոյանի բանաստեղծական ժառանգությունը», «Իրականության պոեզիա. «ապոետիկ սկզբի» կամ բանաստեղծության «անհետացման» տեսություն», «Պոեզիայի իրականությունը. բառի մետաֆիզիկական նախասկզբի որոնումը» վերնագրերով չորս գլուխներից, եզրակացություններից և օգտագործված գրականության ցանկից բաղկացած ուսումնասիրությունը թեմայի ուսումնասիրման արժեքավոր օրինակ է՝ թե՛ նյութի ընդգրկմամբ և թե՛ մեթոդաբանությամբ: Հեղինակը պատկերագծել է մեկնաբանական շրջանակը, արդի հայ պոեզիայի գեղարվեստական համակարգի քննության համար առաջարկել հերմենևտիկական մեթոդի կիրառման արդյունավետ լուծումներ, արդի բանաստեղծության կառուցվածքի մեկնաբանմանն ուղղված մոտեցումներ, կառուցվածքային-նշանագիտական վերլուծության, պոետիկայի և աշխարհայացքի միասնության քննության սկզբունքներ: Նշված մեթոդների և մոտեցումների նպատակային կիրարկումով Աբրահամյանն ուսումնասիրել է արդի գեղարվեստական մտածողության ձևավորմանը նպաստող ազգային և համաշխարհային ներագոյումները, ներգրական գործոնները և արտագրական իրողությունները՝ գրապատմական միջավայրը և գրական գործընթացը, նոր համակարգի կայացման ընթացքն ու նկարագիրը: Այդ ամենը գրականագետը փորձում է ներկայացնել գրական բանավեճերի հանգամանայի դիտարկումներով, անհատի և ժամանակաշրջանի բարդ առնչությունների մեկնաբանմամբ, արդի հայ բանաստեղծների անհատական խառնվածքային և աշխարհայացքային առանձնահատկությունների վերհանմամբ: Ատենախոսը, գնահատելով վերջին տասնամյակի քննադատության՝ արդի հայ պոեզիայի ուսումնասիրմանն ուղղված փորձերը, կարևորում և յուրովսանն լուծում է տեսական

համակարգման և պարբերացման խնդիրներ, շեշտադրում գրական ընթացքի պատմականության ընկալման հարցը:

Հաջողվածության կարևոր առհավատյա է նաև աշխատանքի նպատակահարմար կառուցվածքը՝ գլուխների բաժանումը բանաստեղծների զատորոշման և խմբավորման սկզբունքներով: Նախ՝ առանձին գլխով ներկայացված է Ռազմիկ Դավոյանի ստեղծագործությունը՝ որպես սևակյան շրջանի և արդի փուլի միջև ընկած ու նաև առ այսօր շարունակվող կարևոր իրողություն, ապա՝ առանձնացված է բանաստեղծների երկու հիմնական խմբավորում՝ ճիշտ և համոզիչ վերնագրերով՝ «Իրականության պոեզիա» և «Պոեզիայի իրականությունը»:

Ռ. Դավոյանի պոեզիան համարելով բանաստեղծական նախընթաց պարբերաշրջանի ավարտը և նոր շրջափուլի սկզբնավորումը նշանավորող սահմանային որակ՝ Աբրահամյանն արդիի հայ բանաստեղծության համակարգային դիտարկման արդյունքում առանձնացնում է երկու ուղղություններ, որոնցից առաջինի նկարագիրն ամբողջանում է «իրականության պոեզիա», իսկ երկրորդ ուղղության էությունը՝ «պոեզիայի իրականություն» բնորոշումներով: «Իրականության պոեզիայի» և բանաստեղծության «անհետացման» տեսության քննությունը կատարվում է Ս. Զիլոյանի, Հովհ. Գրիգորյանի, Ա. Հարությունյանի, Դ. Հովհաննեսի բանաստեղծական համակարգերի դիտարկումով: Պոեզիայի իրականության և բառի մետաֆիզիկական նախասկզբի որոնման հատկանիշներով բնութագրվող ուղղության հեղինակներ են համարվում և ըստ այդմ էլ գնահատվում են Հ. Էդոյանը, Ա. Ավդալյանը, Հ. Մովսեսը, Հ. Սարուխանը, Ա. Մարտիրոսյանը և Վ. Հակոբյանը:

Առանցքային հեղինակներին զուգահեռ ատենախոսն իր տեսադաշտում է պահում նաև արդիի հայ բանաստեղծության համատեքստում ինքնօրինակ նկարագրով առանձնացող և ըստ այդմ արժևորվող այլ բանաստեղծների, ինչպես և զուտ գրապատմական նշանակություն ունեցող հեղինակների: Ուսումնասիրության ամբողջացման նպատակով Աբրահամյանը, հետևելով արդիի հայ բանաստեղծության զարգացման տրամաբանությանը և միտումներին, փորձում է պատկերագծել հնարավոր նոր զարգացումների հեռանկարը, արտահայտում քննադատի իր մտահոգությունները:

Գլխավոր խնդիրը՝ առանձին հեղինակների ինքնությունը և նրանց ստեղծագործության արժեքը դիտարկելով՝ տեսնել ընդհանրականը, ցույց տալ «արդի հայ պոեզիայի գեղարվեստական համակարգը», որ ուսումնասիրության խորագիրն է ու հիմնախնդիրը, ըստ էության հաջողվել է աշխատության հեղինակին: Հիմնախնդրի լրջությունն ու կարևորությունը արդեն իսկ ամեն մի գիտական ուսումնասիրության հաջողության առաջին պայմանն է, որ կանխորոշում է նաև նրա կարևորությունը տվյալ գիտության հետագա զարգացման համար: Կարծում ենք՝ այս ուսումնասիրությունը մերժամանակյա հայ պոեզիայի պատմության հետագա հետազոտողներին կարող է օգտակար հուշումներ տալ: Չմոռանանք, որ հեղինակը բերում է փաստական հարուստ նյութ, ժամանակակիցների գրադատական արձագանքը այդ նյութին, նաև իր՝ այդ բանաստեղծների ժամանակակցի, ինչպես նաև նրանց հետ ունեցած անմիջական շփումներից, զրույցներից ծնված մտածումներն ու եզրահանգումները: Կարևոր է նաև, որ հեղինակը արդի հայ բանաստեղծությունը հաճախ դիտարկում է ոչ միայն հայ, այլև եվրոպացի ու ռուս տեսաբանների մտքերի զուգադրումներով, որ, անշուշտ, ուսումնասիրության գիտական ոճի մի ցուցիչ է:

Արդի հայ բանաստեղծության զարգացման օրինաչափությունները ստենախոսն ակնարկային անդրադարձով իրավացիորեն քննում և իմաստավորում է ժամանակի արձակի առանձնահատկությունների զուգահեռ դիտարկումով:

Աշխատության արժանիքների շարքում հիշատակելի են թե՛ ուսումնասիրության՝ բախտինյան իմաստով երկխոսական սկզբունքը՝ քննադատ-բանաստեղծ, քննադատ-քննադատ, քննադատ-տեսաբան (տեսաբանական մտքի հին և նոր դրսևորումներ), արդի հայ բանաստեղծություն-ազգային բանաստեղծական ավանդույթ, արդի հայ բանաստեղծություն-համաշխարհային բանաստեղծական ավանդույթ չափումներով, թե՛ հերմենևտիկական ընթերցման բազմաչափ կիրառումը: Ստենախոսը արդի հայ բանաստեղծության առանցքային ներկայացուցիչներին դիտարկում է միմյանց պարագրկող, հերթագայորեն լայնացող հերմենևտիկական շրջանակների մեջ՝ և՛ տվյալ բանաստեղծի ներքին համակարգում, զարգացման ներհամակարգային օրինաչափությունների լույսով, և՛ արդի հայ բանաստեղծության համապատասխան ուղղության ենթահամակարգում, և՛ ժամանակակից հայ պոեզիայի ամբողջական համակարգում:

Ուսումնասիրության մեջ կատարված ընդհանրացումների շարքում առանձնանում են պոեզիայի էությանը, դրա գոյաբանական առնչություններին, բանաստեղծության փրկաբանական դերին, ինքնաճանաչման և հայրենաճանաչման խնդիրներին, մարդու և ժամանակի, պոեզիայի և հայրենիքի բարդ առնչություններին վերաբերող արժեքավոր դիտարկումները՝ երևույթների պատկերավորման և իմաստավորման կոնկրետ օրինակների վկայակոչումով:

Աբրահամյանի աստենախոսության շատ այլ արժանավորություններ կարելի է հիշատակել, բայց, այնուամենայնիվ, նրանում առկա են նաև թեկուզև ոչ շատ էական թերություններ:

Անգամ այսպիսի ծավալուն, բազմաբնույթ պոետական ժառանգության քննարկման դեպքում աստենախոսության սահմանները պիտի այսքան չձգվեին, եթե հեղինակը առաջնորդվեր իր ընտրած վերնագրի թելադրանքով, և գրքից աստենախոսություն ստանալու ջանքը նրան տաներ առավել խտացման և ընդհանրացման հասնելու ճանապարհով:

Առանձին դեպքերում հեղինակը տրվում է եվրոպացի և ռուս մոդայիկ տեսաբանների մտքերի հաճախակի, երբեմն էլ անհարկի վկայակոչման գայթակղությանը: Օրինակ՝ մի էջում «հյուրընկալվում» են Սոսյուրը, Դերիդան, Օրտեգա-ի-Գասեթը, մի այլ կես էջի մեջ՝ «ինչպես Հայդեգերը կասեր...», «իսկ Ցվետանան հավելում է...», «ինչը Դերիդան... ձևակերպում է...», «եթե Գր.Հակոբյանը Գր. Պըլտյանի հետևությամբ չհակադրվեր...» և այլ մտքեր: Անշուշտ, գիտական աշխատանքը պահանջում է գիտական ոճ՝ զուգահեռներ, վկայակոչումներ, բանավեճ, համապատասխան եզրաբանություն, որոնք ունի այս ուսումնասիրությունը, բայց պետք է խուսափել դրանց չարաշահումից: Կարելի էր խուսափել նաև լեզվական որոշ անհստակություններից:

Սուրեն Աբրահամյանն ունի մտածելու, գրական-տեսական իր գիտելիքները, վերլուծություններն ու դատումները ներկայացնելու անհատական կերպը, շարադրանքի իր լեզուն ու ոճը: Քննաբանված նյութի ծավալը, արդյունավետ մեթոդաբանությունը, համակարգային մոտեցումը և արժեքավոր ընդհանրացումները հիմք են տալիս եզրակացնելու, որ աստենախոսությունը կարելի է հանձնարարել հրապարակային պաշտպանության:

ՈՐՈՇԵՑԻՆ - Սուրեն Սերյոժայի Աբրահամյանի «Արդի հայ պոեզիայի գեղարվեստական համակարգը» ուսումնասիրությունը բավարարում է դոկտորական ատենախոսությանը ներկայացվող պահանջները, ուստի այն կարելի է երաշխավորել հրապարակային պաշտպանության:

Հայ նորագույն գրականության

ամբիոնի վարիչ՝ *Օրտով* Ս. ԳՐԻԳՈՐՅԱՆ

Նիստի քարտուղար՝ *Պետրոսյան* Մ. ՂԱԶԱՐՅԱՆ

Ամբիոնի վարիչի ստորագրությունը

հաստատում էմ

*Լ. ՀՈՎՍԵՓՅԱՆ* զիտքարտուղար Լ. ՀՈՎՍԵՓՅԱՆ

